

平
播
全
書

平播全書卷十五

明長垣李化龍著

批詳

一件飛報夷情事重慶府申報楊應龍帶兵萬餘劄安
穩詳

批土酋情形若此乃內地向來晏然無備何耶仰上川東
道會同總兵官加謹防禦應調土兵徑自調遣應動錢糧
查於府庫見在者徑自那動一面詳報萬總兵高推官何
日至彼並查報

一件地方事遊擊楊敏政呈報楊首手書其情詭詐由

詳

批楊應龍有何冤情只宜具文控訴今統兵侵犯詭曰講明將誰欺乎仰敕馬瀘道嚴督該參加意防守無致疏虞責有所歸繳

一件地方事遊擊楊敏政呈報楊應龍目兵欲出合江割穀攻打合江縣照驗

批楊應龍天朝臣子若果有地界不明之事止應申請詳示何至督兵侵擾豈非甘叛逆以速天誅耶仰楊敏政以此情詰責之松潘兵准留防守仍移文該道查給行糧新召勁兵亦調取操練防禦無使滋蔓貽害地方繳

一件堵截事巡上東道呈防守南川指揮唐宗舜獲功
給賞銀兩由詳

批我兵微有斬獲威勢亦振全賞半賞如議支給一級賞
銀一兩得無太輕再一議之眾寡不敵難以輕戰須來則
殺之去不窮追爲宜是在該道相機行之繳

一件飛報軍情事巡上東道呈請發兵應援碁江及發
工匠木箭等項由詳

批賊勢已深防禦刻不容緩萬總兵東行已久此時想至
重慶仰該道與之協心防守務保萬全已發令旗於總兵
處應調兵將徑行調取分布該道不時鼓舞兵將相機戰

守事完分別功罪以憑賞罰應發丁匠等俱已催發訖此繳

一件軍務事巡上東道呈報楊酋增兵欲與房參將死戰查永川松坎及巴縣艾家壩等處民頗悍勇可當募選及調西陽冉御龍兵二千由詳

批據議俱中肯綮俱如議速行之冉御龍向來感我恩德欲出兵一萬以勦播酋今正其爲國宣力之時也諭令奮勇當先事定當奏聞別加爵賞水西兵亦督發矣此繳

一件急報等事巡上東道呈報楊酋領兵攻破綦江縣由詳

批自警報之後本部院所調遣東援之兵不啻二萬以上云不發一兵何也卽時日迫促就近當有至者仰行總兵官查明速報隨到卽派防守不必齊也繳

一件飛報軍情事巡上東道呈報綦江失陷官兵陣亡重慶危在旦夕由詳

批酋所招生苗幾何而有八萬所言八萬詐也勿輕信以搖人心各處土漢兵已調至四萬餘向來原無預備豈能一呼卽來今已數日想陸續隨遠近至矣但有至者隨宜分布相機戰守守城須以土著人爲主今賊尙未至宜差人密偵向往往事事先知早爲之計一應情形不時飛報毋

誤繳

一件飛報軍情事巡上東道呈報播酋取要饑民屍棺

由詳

批播州係累朝爵土楊應龍亦素有功勞朝廷安忍一旦廢之以貴州報伊戕殺官兵不言勦則無以示四夷耳觀部覆猶欲兩省接院行勘此其爲伊留意尙有餘恩伊乃公然狂逞何也意欲示武於人不免增罪於己誰爲應龍畫此計者愚亦甚矣今日之事旣云激於控訴無門若斂衆歸巢靜聽處分尙可自解仰該道速宣諭之何邦卿等以何事潛匿曾經何衙門問斷伊男身屍見在何所查明

另報

一件督撫地方事巡上東道呈報差指揮李光祚傳諭
楊酋俟取回文至日另報驗

批前以房嘉寵方與對壘而斬其使人殊非兵機故有此
行今渠已破城殺將若縱令以具文爲詞差人往返窺探
虛實更爲不便以後仍加意嚴防卽有齎文人亦勿令深
入內地只爲之轉文可也是在該道酌行之繳

一件飛報軍情事巡上東道呈請催調兵將并糧餉由
詳

批兵將已四出嚴催今當有至者該道卽行總兵官分布

防守糧已行各縣發二萬石順流放去非久當至亦須預
計安頓處所內稱宋事今當力圖無貽悔於後日乃爲勝
算此繳

一件軍務事巡上東道呈請速發兵將刻期來救援由
詳

批綦江已矣重慶南川江津等處城守之具趁今播兵暫
退併工加修務爲必可守以待敵庶免他日張皇失措若
賊至而舉動紛紜去而玩愒時日則城終難保非算也仰
道著實舉行此繳

一件督撫地方事敘馬廬道呈報岡門堡被焚合江難

劄眾兵將永甯兵暫屯瀘州由詳

批此堡畢竟何人所焚仰道查報逆首舉動殊不可知我
只得嚴兵爲備不可以山鬼伎倆爲作止也若合江不能
容兵任從移之瀘州是在該道相機行之此繳

一件軍務事巡上東道呈請以後募兵俱要呈詳本部
仍行申飭將官由詳

批各將官原無招募文移今倉卒召兵恐有奸細又蹈貴
州故事所關非小以後非奉本部院明文不許招兵非經
該道查驗請詳不許支餉該道通行知會此繳

一件督撫地方事巡上東道呈犯人周華等招詳

批本以周甫六之故致內地城破將戮殺人如麻乃叛華
卽夷之人竟從輕比各犯從甫六久矣豈遂略不知其主
之所爲哉今卽發配仍入播耳是縱之去也仰另究報

一件督撫地方事布政司呈巡上東道請餉銀今於本
司庫貯各項糧銀內借支二萬兩解巡上東驗發重慶
接支由詳

批兵至二萬作何分布銀至二萬九千以前作何支用向
後作何稽查該道府並未見呈詳何也卽賊在近地亦宜
一而行事一面詳報况今又非昔時比乎仰行令查明徑
自詳報銀准解發繳

一件軍務事巡上東道呈查過播酋修建倉樓由詳
批逆酋不設險而修路此其欲分兵以肆我可知仰分布
兵馬嚴爲之備向後情形不時飛報繳

一件解發防播兵餉事布政司呈請支解貴州軍餉銀
兩由詳

批取之雲南解之貴州四川何利焉安在其爲處還借餉
也但貴州空乏已極姑准差官解發仍移文雲南該司補
還二十八年應解黔省工食亦准扣抵仍移文貴州該司
知會此繳

一件督撫地方事巡下南道呈請漢土官兵月糧由詳

批已行布政司解發矣兵已及門不爲請餉致令脫巾而呼成何法體向來事多因循殊爲可恨兵至一萬三千不爲不多恐有老弱無用者一查汰之另詳

一件乞恩察苦豁命報效事防播提調武舉胡順堯呈稱奉調防守綦江被楊酋破城鄉擄上營蒙差指揮李光祚到營見卑職苦極向首保職歸城卑職含忿莫伸與酋誓不俱生乞賜精兵千餘直入酋穴斬楊應龍之頭由詳

批胡順堯敗軍之將也不戰死而生降逃法爲幸乃又求討俸糧又求來標下至云得精兵千餘直入酋穴斬楊應

龍之頭不知當日秦江二驍將三千戰士彼何束手就擒
耶小人無恥令人切齒仰總兵官細打四十不許管事繳
一件病勢日增等事巡上東道呈本道患病致仕詳

批近以渝城文武不和恐有他變故令守道至彼調和其
間非有他也分兵雖有前詳已行鎮道共議頃該道揭至
業已允行此復何嫌何疑而以去就爭之乎信地在肩明
例爲重移送印信之事非今日所宜言仰照舊視事以副
一方之望賊自當勦但今日誰爲大將誰爲偏裨某兵倚
前某兵角後仰議妥通詳繳

一件緊急軍務事總兵劉挺呈舉薦副將吳廣遊擊楊

廉等皆職習知其人謀勇作用足當一臂者乞取前來
分布由詳

批吳廣已爲本部中軍不日提廣兵到此其楊廉等一面
咨部及移文各院守取訖仰該鎮仍星夜前來卽今調到
兵已近四萬攻雖不足守已有餘須分布嚴督防守無患
而後可圖進取也繳

一件緊急軍務事劉總兵呈請於東征得勝兵內選募
精壯五千備呈本部彼見播事稍甯蒙劄內開候請軍
門議處自入關以來並無糧餉乞速賜委官該州給散
俾得兼備隨身衣械以慰枵腹之望由詳

批東征兵素飽厚餉且行糧至九月乃終今纔八月安得
費盡大敵壓境明旨屢催急於星火而該鎮欲暫止荊州
練兵此恐不可聞於鄰國亦不可聞於都下也已行布政
司解銀六千兩前去仰作速提兵前來勿令傍觀者再起
別議此繳

一件軍務事石砭宣撫司申稱奉調土兵三千赴重慶
城西劄營乞念本司兵力不當一面之寄再請調二三
千隨分一路前驅搆巢由詳

批據申不但忠勇過人亦且機宜諳練土司中得一馬千
乘足可當勝兵數萬本部院深所嘉賞仰將該司健兵再

整三千聽令調發此繳

一件繳賞辭糧等事石砭宜撫司申本司護印正妻秦氏將兵道賞銀二十兩繳道并請前後土兵五千三員名支給糧餉外外報效兵二百六名不煩稟給由詳

批土司兵多有虛名冒餉者秦氏以一婦人能捐貲給兵辭賞報效此其賢加人數等矣仰巡上東道先動銀六兩打造銀牌一面上書女中丈夫四字給之以示旌異待有功之日將其夫妻並薦於朝另有恩異繳

一件督撫地方事重慶府黃平通判王三策申報地方

播情由詳

批該地方防守事宜節經移文貴州行查數四至今始相聞若非有警想尙泄泄視之耳可恨可恨已行該省添兵防禦仰本官協同將兵竭力固守如眾寡不敵不得浪戰損威但全城卽以功論此繳

一件督撫地方事貴州宣慰安疆臣申辯並無助兵楊酋爲虐由詳

批安國亨昔年欲擒楊應龍本部院久知之此其深怒積怨至死不忘若楊酋得志安氏豈有安枕之日哉助兵之說的知駕禍本部院原不深信據申更覺了然安疆臣年在幼沖明於大義土司中當爲首出本部院深所愛重仰

益遵照近旨竭忠盡節懋建殊勳朝廷不負功臣天地不虧正氣是在本官勉之耳此繳

一件懇恩俯允召兵以效微忠等事參將曹希彬呈請於永甯等處召募士兵五六十教練以俟調征由詳

批曹希彬以綦江將官調合江已有信地自應兼程前來督兵防守今佯爲不知捏文支吾託之召兵若將官人人如此不知國家優養爾曹何爲畏敵如虎臨事避難猶云常勝之家不慮滅官馬武笑人耶今合江兵已萬餘守自有餘仰作速前來防守本部院原不責以浪戰無過畏慎如再託病支吾定叅提拏究

一件利夷殺命事思南府申報拿獲奸細馬良貴審稱
楊應龍統兵要打龍泉思石由詳

批賊勢如此卽今已一月有餘該府守備單弱尙復有完
城乎仰布按二司速呈該省撫院調二省就近土兵防禦
有無失陷仍行該道查明速報

一件地方夷情事巡下南道呈議免調取烏撒府土兵
由詳

批兵隨印轉答應知府何可發兵此前道之誤也事已至
此姑兩罷之令各聽後令不然恐自相仇殺又多事矣須
明諭之無令生疑繳

一件急報地方事巡下南道呈請委官防守地方由詳
批王夢吉守瀘州周大謨佐之有警應援合江楊敏政守
合江吳從周佐之有警應援納谿應援處所亦同信地功
罪同論仰通行知會此繳

一件地方事巡下南道呈報播酋令陳提調復來羅之
渡攻打附近地方乞發兵應援并發火器由詳

批永甯係該參駐劄信地况有土司兵可以協守仰行令
協力防禦務保無虞火藥火器徑行支給須以成藥若止
焰硝何益須設專官製造乃可應急先以委過火器官報
一件軍務事守東道呈南川縣報播兵劫擄東鄉村由

詳

批向日賊突破綦江南川人空城而逃故棄之不守此無可奈何之權計也今兵眾已積可終棄乎若空城可爲長策則無用設守備不設之律矣仰照另行發兵防守如不足不妨增兵一面詳報賊方傾巢犯貴州同日必再犯川東其鄰邊掘塹防我襲之耳非遂終不復出可置之度外也繳

一件督撫地方事布政司呈覆議督餉道條議運餉等項由詳

批據議已妥俱准照行內水運一節宜蚤經理然此其工

夫三分之一耳水運所至重瀘涪三城以後方費處置仍行該道另摘詳應顯行者顯行之應密行者密行之兵家之勝不可先傳勿令賊返得以擬我也此詳該司收之無使奸細錄去此繳

一件督撫地方事巡下南道呈報永甯土兵藏匿播首奸細由詳

批永甯係忠順土司發兵報效何故藏匿奸細致生事端仰行該司長官陳希儒查明速報此事亦不過一二人所爲土兵各有身家自知順逆何必過爲疑慮仍令照舊防守繳

一件申報軍情事巡下南道呈報播首攻打永甯宣撫司雷鳴村等處地方獲功由詳

批播兵縱橫內地如入無人之境永甯兵獨挫其鋒奢世續軍令嚴明可知仰該道先發紅段二匹銀牌一面重入兩銀花二枝重二兩給賞世續其領兵頭目並首級查明速詳賞格一並議報

一件督撫地方事貴州宣慰安疆臣申稱奉令督兵防鄰播一帶地方并領兵二千赴省保障未盡機宜請乞指示由詳

批據申本官爲國宣力殊可嘉尙仰益振兵威務獲全勝

一切機宜照諭牌行本部院且樂觀其成此繳

一件軍務事守東道呈議定立偵探人役專官統領分
布爪探由詳

批哨探乃中軍要務向來所以不專設者以賊勢方張我
兵未集恐此輩反爲賊用耳據議極得肯綮王佐等俱准
收用仍會巡道查相應官員呈委總管一切給賞事宜俱
如議支給事完通查類敘黃平新通判移文申飭繳

一件督撫地方事巡下南道呈報地方夷情由詳

批袁年之父袁子陞被楊應龍凌遲而死者袁年受應龍
招安將來何以見伊父於地下卽夷人必不爾也聞年爲

王繼祖之親仰卽令本官密諭令不得忘親從逆此繳

一件地方軍情事巡下南道呈請兵防守永甯等處由

詳

批永甯告急撤兵自衛亦非得已納谿一千並合江一千俱准發河西防守仍須漢兵二三千則近發敘瀘道兵防永甯者摘一半附之可也賊志在報復行吳文傑督奢世續併力堵截務保萬全繳

一件緊急軍務事湖廣布政司呈議聽備征播兵餉由

詳

批該省近已覆設總兵又經會題沿江諸處調兵一萬有

奇須於本省再備兵三萬方足以當一路土司雖有狐兔之情亦知順逆之勢在鼓舞用之耳施州各司可得一萬永順保靖麻陽武岡各兵可得二萬仰行各道查調一面通詳楚既用兵餉蜀銀俱准留用不足者徑呈撫院另處一切兵糧年內須齊諸凡事宜一面徑行一面詳報

一件地方事辰常黎靖道呈報苗犯東坡偏橋地方已分發官兵應援防範由詳

批逆賊狂逞焚東坡劫偏橋事不爲不急矣湖貴二總兵官不爲不高聲勢不爲不大矣到任者裴足不前未任者逗遛不至不知城池失陷在事文武官有一能逃其罪者

乎劉自西馬一龍等既奉調遣亦至沅州而止又何取於
應援也仰該道差人露牌嚴行催督文到三日而苗不散
路不通賜劔具在死法死敵等死耳榮辱大異惟諸將決
擇之繳

一件督撫地方事巡下南道呈報楊首操練兵馬長官
袁年投降似非真意由詳

批賊既練兵自宜嚴備袁年與賊義不共天投降非僞但
此時納降稍早然不可不密結其心是在該道酌行之此
繳

一件軍務事守上南督餉道呈買運永甯官兵餉米由

詳

批今方議買米銀尙未發文尙未行此月終安能遂運一萬石派夫集夫非一日之事也且一萬石止足三萬人一月之食後將何給臨時再呈派運買辦不益難益遲乎仰布政司會同餉道從長議妥二日內報

一件軍務事布政司呈議武隆墊江巴大等縣錢糧改充軍餉由詳

批各縣糧銀如議留該府充軍餉支用旣不解司恐該府緩於督催該縣怠於徵收以致拖欠不完更爲不便仰行川東守巡道嚴限一月內取該府庫收繳到方可扣抵此

繳

一件緊用兵馬器械等事總兵劉綎呈請馬兵器械由

詳

批文內種種俱切實用至欲速圖進剿尤見滅賊之志甚銳若該鎮用心如此本部院何慮焉各項器械已行各衙門解至軍前驗試未完者一面買造主客兵已調至數萬前以該鎮言廣兵可用故調之今廣浙之兵皆將至又以爲征虜征倭兵勇敢倍之征倭之兵卽川兵也今川南招募已多惟所調用且前征倭僅萬人今挑選二三萬何處得來查明另報

一件軍務事布政司呈議監軍道職掌由詳

批各處官兵無論主客俱聽該地方守巡道點驗及覈放錢糧監軍道挂號及稽查虛冒其餘俱如議行若將官跋扈不法有司稽違誤事監軍並各道不時叅呈處治通行各衙門知會繳

一件軍務事劉總兵呈請調到官兵行糧詳

批今川中土漢主客兵已未到不下十萬未見議作何分布止議增調何也且調來方選選不中者又發回無論行糧枉費而鼓譟騷擾之患種種可虞湖貴二省方苦無兵今盡調之川中令彼何以爲計仰監軍巡東二道會同該

鎮議妥另詳鎮溪所調赴重慶兵係何衙門明文取來有無堪用並查報

一件緊急軍務事遊擊王之翰呈請發漢兵數千互相調度由詳

批王之翰請發驍將漢兵其不能獨當一面可知仰總兵官量撥精兵爲之掎角周以德如見在標下卽行令前去督防繳

一件逆酋倅旨等事守東道呈報五司官民流落召集苗夷衝鋒由詳

批五司爲賊所破不能軍矣但其創鉅痛深倘所謂楚之

二戶足以亡秦者乎姑以爲鄉導可也用以行勦則疏矣
仰黃平通判召集隨其多少編爲隊伍令作楚兵鄉導繳
一件調選精銳分任責成等事川東監軍道呈請行令
劉總兵將見二萬操練其少兵一面令刻期調選以足
三萬之數由詳

批兵貴精不貴多精則二萬已足不精卽三萬無益也仰
行令將見在兵嚴行操練以備進勦不足則建武募兵及
平茶等兵或別有調到者該道卽行揀選如數而止湖貴
方被兵不必遠行招募虛彼實此本部院日夜憂之矣牛
酒行糧等項照例議詳

一件緊急軍務事巡下南道呈土官袁起龍集兵由詳批土兵未動難議支糧仰行令整兵聽調臨時自有優養賊黨已搖宜多方密行招誘不可久示持重恐失事機是在該道圖之耳繳

一件軍務事川東監軍道呈賊兵劫殺夾口壩須得勁兵八九千前去綦江立營由詳

批綦江履行屯守至今尙無成說若賊復得而焚之是又一番破城也已行總兵官督發前去兵行之後新縣官即可赴彼視事糧運卽應隨發仰該道通行移催繳

一件軍務事布政司呈議動支銀兩召商採買柴薪由

詳

批如議行此須召商得人無令市棍花費本銀無濟於用是在掌印官留心本部院且以此詳官矣此繳

一件軍務事貴州布政司呈議軍前理餉紀功官員由
詳

批各官既經議妥俱准委用土司掌印官提調於省城一
監軍分督於東西二路大征事重各須盡忠竭節殫力從
事功成自有信史不朽不直目前優敘如避難債事責各
有歸通行申飭知會繳

一件播酋猖獗等事布政司呈添造軍器并支發已未

完數目由詳

批據議武備略具亦足以待敵矣准動支上緊催買製造
務在時月之間盡數報完日先將經管官分別勤惰呈
報以憑獎戒外鐵盔甲尙未議及仰行嘉定趙州同一面
估計一面打造另詳報

一件軍務事分巡湖北道呈議兵務由詳

批寇在門庭南兵卽發亦以後時况方在道傍之議必無
望矣本部院後行調永保兵二萬麻陽等兵五千五司報
備兵三千及十三哨殺手之類可足三萬以上仰火速差
人催齊付之總兵亦足以當偏橋一路進勦事在燒眉不

可遲也速報速報

一件申飭運餉事宜等事巡下南道呈議編派運餉夫
役由詳

批原行並無五箇月之說今一路夫價至三十六萬計四
路當至百萬比之通省派夫更重是一解不如一解也仰
照另牌行繳

一件軍務事重慶府申請發運馬料由詳

批該府見在料如議運送該縣支用該縣所申原恐誤事
遂至倉皇失措耳何遂以去就爭之哉同知不爲不尊知
縣乃其本管署官之難何以稱焉寇在門庭日不暇給以

一無要緊支移輒爾曉曉若此不知一日能辦此幾紙公文非所望於宏濟艱難者也繳

一件慎收降事東監軍道呈委將官各隨帶兵招降並安置降夷由詳

批各官如擬委用降人審實俱發江北州縣安插量支倉穀養贍有司官招攜有方降人得所事完優薦安插失所致有他虞定行重處又訪得以前招降官多需索降人銀至三五兩不等名曰投降此禽獸夷狄所不忍爲與楊應龍何別焉以後有犯治以軍法下人作弊罪坐本官通行申飭繳

一件酌定運夫等事巡上東道呈派定運夫由詳

批如議行民間切身利害須爲著實籌算方便一分卽受賜一分如近日南川之夫又來涪州運糧皆非算也邇來民不堪命所不忍言幸留意焉繳

一件軍務事思南府申請行令調發施南土兵八千名至婺川就便徑抵龍泉不必到府免滋往返至於糧餉按月差官解給由詳

批逆賊狂逞該府危於累碁本部院發銀調兵爲之防守原行錢糧不敷徑詳該省兩院措處接濟今文內略不見有措處呈請之意止令本部院寬運解發川人豈能遠赴

黔中餉兵乎臨渴掘井人以爲遲今並井亦不掘甚哉其可嘆也仰速照原行徑詳該省兩院措處兵准行令劄委川龍泉二處亦速行令預備糧餉若致脫巾而呼責有所歸此繳

一件軍務事統領河南兵馬遊擊任承爵呈稱營兵由上水壞船泮死吳從鑑等十四名請給恤典由詳

批各兵萬里遠征未靖蠻煙先葬魚腹言之令人潸然淚下應得恤典仰監軍道議詳姜宗堂等覆舟殺人仰行巡上東道嚴究招報

一件飛報計斬播賊首惡事石阡都司錢中選呈報餘

慶司寄住偏橋生員曾文學父子及李佑等將首惡趙仕登并家奴慶生等用計殺死斬首三顆特加敘賞由詳

批中川計殺李旭黔中計斬趙仕登賊之心腹手足頓失不足平矣仰右監軍道將會文學先給發去劄付冠帶功次查明速報

一件逆首威劫等事川東監軍道呈各土司不許以招降邀功生事阻絕降民由詳

批調士兵原爲殺賊非令招降也乃因而爲利致降人失所是助播爲虐漸豈可長以後止許聽令征進不許妄招

害民其以前劫奪子女並給原主如占恡不發罪之仍移
文川南監軍道通行土司兵知會南川招降事聽高推官
會同將領行該縣防守土漢兵聽周國柱嚴束候勦俱移
文知之繳

一件軍務事東監軍道呈請申飭領兵各官不許妄行
牌帖招諭惟整兵進勦由詳

批文職主招安武職主征進各司其事所以相成若領兵
官一槩招降無論白頭牌票易於詐假且其禁令不嚴則
下人之需索難免安插不妥則流人之怨恨易生更有他
虞尤爲可慮以後各領兵官止宜整兵聽征不得妄行招

降違者罪之通行知會繳

一件軍餉事巡上東道呈抽驗法馬由詳

批如議行抽驗之法於革弊釐奸爲最要但須於數日之前蚤爲分散以便分鑿無令各兵以守候爲苦反稱不便此繳

一件查究事東路管餉通判劉之淵申犯人盧旺折夫賣餉由詳

批違餉勞民誰不知之所以必如此者正以防近地之不足耳若如此輩所爲坐見米價騰貴軍士枵腹矣事關軍機法難輕縱仰重究報押夫官明知故縱並連坐之繳

一件軍務事巡下南道呈請總兵駐劄合江詳

批總兵總管一鎮今分一路已自拘方難更責之坐守一
隅無事駐鎮合江有事隨宜居中調度可也仰移知之繳
一件緊急軍務事陳總兵呈請咨行兩廣軍門召募廣
兵二三萬以楚兵兼之庶可濟事由詳

批楚地兵糧俱已備集各道所報文案昭然逆賊狂逞經
歲於今春水漸生進兵已緩若待招廣兵而後從事非需
以歲月不可是決西江之水活涸轍之鮒也兵觀拙速未
聞巧遲歧路回車千里坐失崇山幽都何可偶也仰照另
文行繳

一件軍務事巡上東道呈議動銀發南川收貯聽支由
詳

批逆賊狂逞生民如在水火在事文武宜披髮纓冠而往
救之乃至議及氈簾裙褥之類可謂揖讓而救火雅拜而
解圍矣然亦自有等風痺不知痛癢上官此時尙以儀文
不備責人者又何怪乎該縣之倉皇失措也據議已妥俱
准照行傳銀數照發應賞銀候另行餘俱如議仍通行各
衙門知會繳

一件軍務事巡上東道呈劉總兵續召募漢兵八百有
零准收支糧由詳

批曹操南征兵八十萬周瑜禦之所以成赤壁之捷亦不過三萬而已今取一土酋八路之一用兵三萬止少一二百名尙欲再選此等舉動何可使聞於賊姑准收糧各項夫役俱在其內不必更取備於有司矣繳

一件軍務事貴州左監軍道呈報條議兵將部署料量糧運等項開款由詳

批各款條議纖悉俱備可謂良工苦心惜乎其稍遲也川省諸所已備貴省不知已備否如未備併工爲之自有捷法如穀不能成米在城每一家散五斗一日可爲米數千石如衣甲散銀各家一副一日夜亦可得數千件如造船

不及卽搭筏自可渡軍如運米無夫卽以稍弱軍爲之仍各執兵自衛如無火藥散硝礮營中隨帶木臼自舂諸凡此類皆可應急該道通行各道將連夜備之猶可及也繳一件地方事分守思仁道姑令守備楊惟中戴罪立功恢復龍泉由詳

批楊惟中避賊失地已經拏問旣稱情願恢復姑先取死罪招由質其妻子於獄如十日之內能復故地進兵者另議如係支吾卽行監禁詳報

一件軍務事分守思仁道呈請發施南官兵八千名糧餉接濟由詳

批已知該地方錢糧難處盡發萬餘兵本折之餉矣所動勞道府者惟有買米運米二事當日夜悉心料理勿再曰無處買無人運事事盡委之他人也繳

一件阻撓軍務事富順縣申稱民奸棍熊問盧多祿等包夫阻撓軍務駕捏匿名紙帖遍市貼誣由詳

批銅梁民倡義急公富順民興謠撓法二邑風俗人心卽此可槩見矣此必一二棍徒所爲無足爲意該縣但爲所可爲不必爲之灰沮亦不必多方伺察致及善良人各有心久當自定也繳

一件緊急軍務事巡上荆南道呈長陽等三戶土兵難

以調用由詳

批今大兵已集無藉土戶况土官既很不可使則有功無功俱爲不便拒虎進狼非計之得也姑已之繳

一件帑藏罄竭等事貴州布政司呈詳議處軍兵由詳批當用兵之時而議汰兵似駭聽聞不知汰冗兵正以養精兵其事蓋相成也仰二監軍道會議妥確通詳

一件清查差官真偽等事分巡湖北道呈犯人何世卿等招詳

批查招稱賴坤五鹽給有印信桅封註定常武地方發賣則船至常德可以止矣石仲先水程未顯地方招稱議往

辰州浦口則亦宜至辰州而止於偏橋地方風馬牛不相及也何世卿爲之具稟討照過關乃稱總督標下把總奉劉提督差委押鹽至偏鎮土司犒賞苗兵偏橋鎮遠別無土司止有播州耳非欲入播而何蓋世卿係偏橋人密邇播州知彼中鹽禁價高故欲攬鹽給照由偏鎮徑入播州圖利鹽商亦餌其利而從之或別有播人交通亦不可知所重通播盜印其小小者也該道所駁頗見端緒問官以事大未肯深求然使其計得行播人頓添十倍兵力害甯有極哉仰盡法推究確招詳報鹽每包若干斤共估價若干該道親驗以便充餉此繳

一件地方事貴州右監軍道呈請申飭軍令以後不許逗遛以責後效或行思石道行府勘查龍泉失事的實另議由詳

批逆賊狂逞龍葵思石危如累碁各將領應應援而不應援應固守而不固守致令殺人如麻失地百里擁旌建節之夫不如一土官安民志見危授命可恨可羞仰一面嚴行將領勒日恢復贖罪仍會行思石道勘明從重招叅通詳繳

一件軍務事分守新鎮道呈運餉夫役進兵隘要應用藥餌等項開款由詳

批據議運餉進兵事宜種種詳妥可謂當機俱准照行此時呈詳稍遲料彼中已一面料理想不誤事如有未備不妨一面進兵一面急圖所謂七年之病三年之艾及今圖之猶可及也繳

一件懇彰天鑑等事貴州宣慰司申宣慰宋承恩願建功殺賊若曰罪過不明乞移文本省查勘有無忠奸情節等因由詳

批楊宋爲婚土司常事無足異也惟逆賊應龍旣已得罪朝廷事在必勦而宋承恩猶與之往來不絕卽曰不漏洩軍情其誰信之雖然朝廷之恩天蓋地容本部院之約撫

順討逆卽今賊中頭目源源出降俱淮安插立功況宋承恩原係土官豈以其曖昧之迹遂絕其血食之祀准免前罪且容立功報效若能暗通田氏朝棟及左右人等斬應龍以獻無論照格陞賞應龍之女仍給與之公義私情兩得之矣此繳

一件乞委賢能佐領等事南川縣申再多委官員協力各官收支餉米由詳

批解米之人守支已非事體至令此時卽運至金子壩幾於病狂斯時也而有斯令也傷哉南川之民其塗炭乎仰督餉道會同巡上東速行處妥繳

一件土兵相鬪事巡下甬道呈報鎮雄馬湖土兵相殺
由詳

批土兵遠調原爲討賊乃不思一朝之忿動至操戈相戕
未有尺寸之功已著跋扈之狀領兵官紀律不嚴本應重
坐念進剿在卽姑不深究仰行令以後解紛息爭立功贖
罪如再蹈前非定行處斬領兵目把一體治罪該道通行
諭知繳

一件地方多務等事驛傳道呈龍場養龍等驛申請協
濟由詳

批驛遞此時雖稱多事然興兵勦逆百年來不時見也土

司擁有爵土久享承平不於此時出力報效更待何時卽宜加增夫馬在土司自爲裒益不宜求之有司也仰諭行該司遵依應付無誤軍機此繳

一件督撫地方事貴州都清兵巡道呈宣化司土舍何鯨把總劉應辰子劉登閣召撫滾水等一十五寨苗夷請頒賞花紅由詳

批各苗助逆虐民罪不容誅旣已向化姑准免死仍呈該省撫院動支官銀製造花紅銀牌買辦牛酒大行犒賞用獎忠順招撫有功員役事完通敘其革夷冷西索股黃岑秦騰等罪逆深重怙終不悛難以姑縱行令總兵官相機

雕勦以除民害此繳

一件再陳一得等事總兵陳璘呈條議軍機五事由詳批大將得斬偏裨偏裨得斬千把總及哨隊長俱如所議懸賞賞功銀業以有行當再令多發防邊事例止以血戰爲功不以損軍爲罪今後亦止取獲賊不問其他若不得賊而徒損軍則亦無所逃罪文法自不必一一拘若乘機取事當錄其功逗遛後期又當議其罪亦難以槩論也仰通申飭遵行以圖全勝此繳

一件緊急軍情事總兵陳璘呈報思石二府無餉接濟乞行思石道轉行二府催辦由詳

批湖省兵糧自去年八月催償以至於今非一日矣景象若斯令人驚駭經管各道非以空文支吾則以閑言評議令人仰屋竊嘆而已事已然眉仰該鎮多方召募催督有推委誤事者不問是何衙門從實揭報以憑叅究救焚拯溺勢難延緩該鎮任其勞本部院當其怨他無所顧也此繳

一件地方事貴州遊擊楊惟中呈稱發兵裝塘一鼓衝鋒陣斬首級五顆賊奔入關功雖無幾實解婺川之危由詳

批楊惟中覆軍失地詭稱恢復免罪今一步不敢入龍泉

又以零級輒稱解婺川之圍小人之無忌憚一至於此可恨可恨仰分巡思石道嚴查究報

一件軍務事貴州按察司呈偏橋長官楊國等撫出九股苗頭曹錢慮父子等相應從優賚賞或給冠帶由詳批播賊向來妄稱九股助逆明欲駕禍諸夷曹錢慮既稱九股原未助播又欲截江勦賊忠順可嘉准給劄冠帶約束羣苗外賞三兩銀牌一面銀花二枝紅段一匹用示優待若能截殺黃岑等苗及撫化土官有功另行陞賞楊國臣謬思忠等行令再行招諭事完通敘此繳

一件查究事南川管餉通判劉之瀾呈犯人汪意等包

貼運夫由詳

批轉運事關重大各有司漫不經心任從猾役包攬致誤軍興罪不容追俱應提問姑責後效文內銅梁等州縣正官先住俸戴罪責令親自督夫運米候事完類叅汪意等有罪人犯嚴拏究解仰守東道查行繳

一件軍務事委官知縣鄧宏烈申稱各官兵到婺川縣未有糧餉且思石二府俱各數少乞行設處由詳

批履行該道府預備糧餉又發銀令買備本部院所以爲思南至矣兵至而止有一日之食是尙可以爲國乎地方之不失陷者幸耳仰分守思仁道嚴行措辦轉運進勦之

期已過如誤大事實有所歸此繳

一件緊急軍務事楊惟中呈報本職乘銳與賊連戰數捷追入苗巢已經恢復龍泉掩埋骸骨召集流離以俟大兵由詳

批壯哉楊惟中遂乘銳直復龍泉也龍泉積骸滿街賊所厭棄得無與鬼戰乎仰思仁道查報

一件重地師旅方殷等事督餉道呈議派夫蠲免錢糧以濟軍興由詳

批東南派夫西北徵銀此法紀人情共稱便者非有所偏累於其間也今勅敵對壘兵刃未接天下之事未知始終

西北尙未定議免派東南豈可預定免徵今但當戮力平賊勿生別議以搖人心令小民反不可使則事去矣繳

一件軍務事重慶府申發過各州縣夫價銀兩由詳

批原行該司解銀赴該府聽支募夫非欲其徑行支放也該府何所據而定爲每夫一名該銀三兩二錢三分有零又何所據而徑分發各縣若各縣照數給夫不知此銀作何下落後來將何接濟署印官醉生夢死任憑吏書顛倒爲公爲私皆不可知仰巡上東道嚴提究解原銀速行各州縣毋得浪支致後不繼仍議妥確之法速報

一件緊急軍務事守東道呈請檄諭支發東路官兵餉

銀由詳

批該府發各州縣銀何其速發該道所取銀何其遲蓋彼有常例此無常例故也吏書之罪不容於死向來各官爲所侮弄幾於不成衙門可恨可嘆前銀曾否支發仰府速查報

一件防虜事松潘道呈議暫免召募陝兵由詳

批地各有兵兵各有用何必借才異地陝兵旣無可募卽募本地之驍健者充之是在將領訓練耳俱如議行繳

一件軍務事參將麻鎮呈請行查議修船渡送運夫由

詳

批船非一時可修若待船成而後運糧遲矣或有見船可用或一面造船一面搭棧一面搭橋仰巡上東道督行該縣與麻參將協力爲之松坎播界在營中隨宜處置何待申詳此繳

一件極惡叛苗截路殺死官兵等事湖廣辰常兵備道呈報五開衛地方皮林寨惡苗爲害戕殺官兵數多由

詳

批卽今勦播其餘小小苗警宜一切置之白刃交前不顧流矢勢則然也皮林寨之事甚微黃冲霄何人可任專征至撤勦播之兵以分之卒至失律喪師一軍皆沒豈不惜

乎此等事從來不以一字相聞直待失機至此乃始呈報何也黃沖霄革任聽叅急擇才勇開將代之仍亟行各衛所州縣一體申嚴防守所殺官兵的數幾何查明速報

一件遵明旨廣招徠等事總兵陳璘呈報招撫過九股苗頭汪外望稍等由詳

批苗人皆吾人也向來撫馭乖方致逆賊利陷威劫反爲彼用該鎮一旦招撫盡入版圖豈不快哉劉合明准暫爲管轄俟各苗報效有驗卽給劄授官令永歸王化該鎮小賞銀幾何而盡爲撫苗之用仰監軍道查補繳

一件軍務事重慶府申請查夫價銀兩由詳

批凡各州縣發銀該房吏書俱有一定常例所以不及請
詳擅自作數分發者利令智昏耳此何等大事亦了無忌
憚張忠定治蜀一錢斬吏有以也仰仍盡法究報

一件軍務事巡下南道呈淘公灘降民二千一十八名
口安插石寶寨係運夫經過地方恐有疏虞或安之別
土由詳

批夷民歸化多至二千攜家以出必無他虞若安插失所
反有他虞仰會同監軍敘瀘二道議妥一面量行賑恤無
致飢餓於我土以阻後來者之路繳

一件遵明旨廣招徠等事總兵陳璘呈招撫過夷苗由

詳

批今日征勦止誅逆賊應龍其餘頭目親信之人但肯投降卽准免死立功况各寨苗夷乎各苗旣願歸化卽當赦其往罪咸與維新仰移行監軍道各給免死帖文隨便安插如能殺賊立功重加陞賞張鵬舉等紀錄通敕此繳

一件急缺征兵糧食事陳總兵呈征兵急缺糧餉請催發接濟由詳

批該省餉事自去年督催以至於今節據該道回文皆稱必不誤事今兵至白泥顆粒不給豈欲以兵與敵乎千里餽糧師不宿飽况告飢於千里之外乎嗟嗟事去矣事去

二 封 三 卷 一 三
三
矣數萬雄兵不見敵而飢死悠悠蒼天此何人哉仰督餉道一面回報無令撤兵就糧也

一件請議進兵事陳總兵呈報進兵道路由詳

批該鎮進偏橋路陳良玘進龍泉路本部院分布久定已經奏聞公移私劄不啻數四該省餉道止因糧米不備遂欲移兵就食擅行議撤是又一軍門也將任軍君命有所不受該鎮自當便宜行事何故千里請命坐失事機仰照原行速進如後期誤事實有所歸三渡關卽偏橋入播之路苦竹關則在板角之西設伏張疑任陳良玘行之該鎮仍調度萬全不得狐疑取累此繳

一件地方孤懸無援等事湖廣布政司呈請題留在庫
虞衡司等項銀兩并嚴催解司湊餉通候播事甯日處
補其加派錢糧免分貴州由詳

批播賊一破偏橋直走清鎮全楚勢且不保今日利害三
省共之何謂湖省用兵本爲黔蜀也二省助黔奉有聖旨
四川僅派銀十二萬已借十萬給黔湖廣派二十餘萬可
以一萬塞責乎如曰該省養兵四萬則四川養兵十五六
萬非無事也施州兵以楚兵用之楚帥信地亦四川餉之
矣漕糧已屬京餉豈得遂作楚數廣西已餉黔三十萬矣
湖省助黔非十萬不可仰作速解發無致誤事繳

一件軍務事管綦江事周同知呈請議加設馬匹應遞
由詳

批該縣掌印官到任久矣及今方議馬匹何見之晚也此
地里民瘡痍未起何堪走遞近已發各處馬五十匹當再
發五十匹想亦足矣所議事體甚覺拘攣非撥亂之才也
仰巡上東道速議報

一件仰仗威猷官兵奮勇攻破堅陣險固等事總兵李
應祥呈報官兵攻打四牌井天邦固三百落等固斬獲
功級由詳

批貴兵素弱賊易視之乃今一舉而破三固斬首二百餘

級振積弱之勢寒羣苗之膽豈不快哉仰監軍道查明議
敘仍行令益奮忠勇直搗賊巢以成全捷繳

一件軍務事分巡貴甯道呈請憲檄責令安疆臣戴罪
與疾督兵進剿無逗遛示怯由詳

批天下興兵誅播水西一軍獨逗遛不進豈其目把之昏
於利乎抑亦安疆臣拙於計也與疾討賊自有故事仰該
道嚴督進兵無爲傍觀者所疑王法軍令未易干也繳

一件軍務事敘瀘道呈請發懸賞銀二千給吳文傑曹
希彬等支用由詳

批軍中旣需懸賞卽便隨便支發千里請詳豈不誤事仰

作速發去以後緊急事務須以徑行無拘文法誤事繳

一件軍務事東監軍道呈南川進桑木關一帶設營首
尾聯絡護餉由詳

批大兵深入急在糧餉防護單弱豈爲萬全之策如議楊
登山在真州居中調度任承爵在清溪王之翰在圍村南
川各領所部兵防護兵如不足就近便宜撥給金秉鉞守
城葉當春防守江口違者各以軍法從事該路兵行已遠
聽該道就近調度將領阻撓叅來重處餘俱如擬行繳
一件斬獲賊級事左監軍道呈報泗城州官兵於蝦子
渡河渡關河邊斬獲功級共二十顆由詳

批貴州土兵素以精強自命乃臨敵執訊獲醜首在滇兵此輩得無汗顏仰查明類報

一件嚴究凌虐罪囚事按察司呈犯官鄧學思等由詳批防播亦多方矣何汲汲於斃獄囚蒸江罪囚出獄以城破耳破城者非獄囚也斃之何爲各官舉動若此其不爲賊魚肉幸矣鄧學思等姑依擬發落實收繳張與行聽別卷另結

一件軍務事巡上東道呈請開銷稿賞銀兩由詳

批賞不踰時爲有功也尋常無事何以賞爲卽有應賞者本部院已行之矣各道之賞是亦不可以已乎將來師老

平林全書卷十五
財匱脫巾一呼欲再行賞難矣無政事則財用不足此之謂也姑准開銷但恐不便奏繳耳此繳

一件軍務事巡上東道呈請委官協運糧餉由詳

批麻鎮庸懦退怯有誤餉運已行拏解准行楊敏政程試共理護餉之事畫地責成無致有失仍移行楊敏政留兵千餘以一千總領之防守江津繳

一件軍務事巡上東道呈都司王芬等斬獲新村楊木田賊級共六顆應否准敘准削由詳

批零級不算謂未見對敵輒報斬級恐有妄殺平人冒功之事故禁之耳若打洞對陣眾證明白卽無功級先登者

仍應議賞何論斬獲功級多少查原詳並未到部院何處
失迷查明詳報

一件軍需正急等事布政司呈乞題將搜括無礙銀兩
特賜停免由詳

批大兵進剿日費數千方且取之內帑助之各省本處庫
藏又安得有無礙錢糧此時而議搜括是欲以蜀與賊耳
仰候會題行繳

一件飛報血戰大捷等事委官鄧知縣申報播賊統兵
馬三萬餘二路包圍關隘施兵奮勇迎敵獲功大勝由

詳

云 卷之三十三
三
批施兵以少擊眾擒斬數多良快人意仰候另文獎賞及
催楚兵合營聽本官督進土兵易驕賊謀最狡仰令益加
謹慎以保萬全功級驗明止將兩耳及小功解該道查驗
不必違解此繳

一件軍務事巡下南道呈犯人孫孝招詳

批此事自去年有行到今只爲餉米一事耳前云移付工
房今云除餉米另行造冊齎報外竟未見冊也不知該吏
問罪何益於事州官昏庸至此將何以佐軍興仰將掌印
官提究招報

一件軍務事巡下南道呈議安樂二縣運夫由詳

批舉大事當有一定規模移短運以充長運所濟無幾並短運者逃避不來所失多矣彼中夫至三運苦累垂死不妨令自行更班無拘原行各路皆已數變其法乃通濟也繳

一件勦播重務愈處愈竭等事巡下南道呈報都司吳從周等報老弱陣亡兵數似應紀錄獎賞由詳

批各官清查冗冒節省數多如議先行紀錄獎賞事完仍優敘川南二路合爲一路兵不必多乃各營文武官扶同欺冒略無清查可爲痛恨仰仍通行查報

一件乞天察辯鳴冤事巡下南道呈原任守備張本立

功贖罪由詳

批督餉亦可論功不在買級安功也若論材器使則藍芳
威宜入營張本宜督餉若合江之餉不誤功愈斬級卽當
優敘仰查行繳

一件軍務事永甯宣撫司申稱奉調征播幸欲速成完
功以同天意安敢望圖瓜分叛土而浸忠順之家倘獲
微功乞恩優賜級銜名色萬世仰賴至於本撫疆界各
有圖冊可考由詳

批該司不願瓜分叛土止求加賜級銜勇而知義良足嘉
賞至於土司疆界自有版籍冊志可考稽何必先爲喋喋

也仰巡下南道查明類報

一件軍務事巡下南道呈請瀘州改徵餉米由詳

批欠糧者貧民應夫者亦貧民糧雖以二萬四千徵銀而仍以一萬徵米恐米之所得無多而夫之不集如故也姑准照原額盡徵折色仍少緩以待夫回之日併徵之此時惟專令運糧上人之寬恩若此若再有逃亡是該州真頑民不可以化誨懷服者當純任法耳此繳

一件軍務事瀘州申請將改徵餉米照舊原價徵銀在官發富民兩平買運由詳

批瀘州當秋收之時官不催徵民不輸納今青黃不接之

時米安得不貴價安得不高此州運夫甚多不爲一處恐
米與夫兩事皆誤但無令各處以爲例可也仰巡下南道
查議報

一件軍務事同知張龍呈詳委官專管瀘州并究做押
夫省察由詳

批瀘州運事之壞一至於此兵在敵巢一旦絕食不戰而
潰奈何奈何仰巡下南道行令敘州府劉知府前來瀘州
督理收放邵知州責令親自入山押夫况賓賢二日內解
報俱速行繳

一件軍務事巡下南道呈議運餉事宜由詳

批如議行內扣銀買米設法順帶恐亦有難行者須令張同知通變爲之不必拘於成法致礙事機本部院但取不誤事耳不以一切之法責人也繳

一件軍務事敘瀘道呈請查究未解餉米州縣由詳批倉穀碾米有何難事輒爾延慢及至行催又捏報起解甚屬可恨仰行漢州九州縣官俱住俸戴罪管事如過三月不完官罷斥吏綱打革役如罪在解役並以軍法重處通行催併繳

一件軍務事貴州思石兵巡道呈報招降過播民王正倫等共八百二十六名口俱經給賞安插由詳

批招降一人孤賊一黨全民一命甚善事也仰查明原招之人事完通敘聞兵有竊斬降人以充級甚及於行客者大干軍紀法在不赦該道時時覺察之此繳

一件飛報攻破險關等事思石兵巡道呈報施南等司官兵攻破板角關巖圍擒斬甚多另報由詳

批土兵奮勇克關功有可嘉至十八日賊合兵來攻又以孤軍破走之此足愧諸將之觀望者以後但宜申令嚴防包截會齊入壩不可過相責備以挫其銳仍速催陳總兵合哨並入以收全功此繳

一件飛報捷音事石砬司申報十七日督同各官兵攻

破金子圍寨乞速催諸路並進以援本路深入詳

批據報師已出險前爲坦途豈遂長驅入播耶仰監軍道就近調度令相機進止無以孤軍入巢繳

一件逆天首惡逐殺生母等事巡上荆南道呈禁覃寅化不得妄意出兵由詳

批覃寅化助播之事不可知但其見播賊滅亡無日而急於自白亦其畏王法守臣紀一念之良心也第與馬千乘難以並用姑令守分自保再有征調自當用之諭知之繳

一件軍務事巡上東道呈請再編夫相幫協運由詳

批一兵一夫卽遠無不可供而猶苦不足此有司不能約

東逃亡太多之故再派不無累民事急勢須出此姑如議
嚴行催發如再違誤正官拏問繳

一件仰仗天威官兵奮勇等事思石兵巡道呈報官兵
攻打關巖圍斬獲功級由詳

批施兵以寡擊眾屢報斬獲功殊可嘉第孤軍久屯亦有
可慮仰速催楚省所發容美桑植之兵前來應援陳總兵
日久不進殊非事體併差人守催前來合哨擣巢繳

一件軍務事巡上東道呈查過麻鎮失誤運餉緣由詳
批麻鎮畏怯逗遛致三軍絕食若非該鎮疾驅入關因糧
於敵其不致脫巾之變者幾希既幸軍機未至大誤姑饒

死革職充爲事官守城及護餉如再誤事通諭前罪此繳
一件請拔給安家行糧犒賞事婺川縣參將王鳴鶴呈
請拔給行糧犒賞由詳

批內地調發與出征絕國者原自不同安得以東征爲比
議添五錢是亦不可以已乎此兵已調發貴陽路仰貴州
左監軍道會該參議妥通詳

一件緊急軍務事巡下東道呈犯人譚孟仁等招詳

批招兵重事也掌印官不清理委之佐領佐領不清理委
之書手詭騙錢物尙可諉曰不知冊內公然造爲護守城
池各官無一經目者尙有天日乎此等賸官滿堂都應黜

革但知縣六月到任主簿三月到任念其初至該道姑提
戒知縣責十板主簿責十五板喻天榮失誤軍機罪不止
於徒配通提從重究報

一件飛報大破賊兵事宜慰安疆臣申報三月二十九
日本司與鎮雄兵於母氏國與賊大戰殺死賊首提調
五十餘人又殺死第三子楊惟棟由詳

批該司兵從入播未經接刃本部院甚以爲疑今一戰大
敗其眾令人快然已發千金充犒並行該省量給糧餉今
川兵已入圍圍仰益鼓舞兵眾奮勇夾攻坐收全捷以膺
懋賞此繳

一件軍務事左監軍道呈首楊應龍妻田氏餽送隴澄
禮物折程銀兩由詳

批壯哉隴澄杜私交絕利媒申討賊之義寒逆賊之膽豈
不毅然烈丈夫哉使向來當事及各土司皆立心秉節若
此曷至逆賊得遂其賄結之私致成滔天之禍也已另行
獎賞仰該道再製大紅段旗一面上書忠清二字給之令
每戰樹於馬前以作士氣此繳

一件飛報大捷事左監軍道呈報水西隴兵二十九日
大戰殺逆賊僞內府提調把總苗頭五十餘人斬其子
楊惟棟由詳

二 卷之三十一
五
批烏江之役貴人於安氏有竊鉄之疑今一戰而心迹自
矣是役也視逆賊兇渠之餽保水西忠順之名順逆之報
錙銖不爽皆天也功次查明類報事平自有渥典賊最兇
狡卽敗退不難忍恥行成仰益勉勵疆臣弟兄嚴督目把
無爲所惑務建全功以保榮名膺上賞繳

一件申嚴第一軍令禁止殺降事兵巡思石道呈請嚴
禁殺降冒功乘機劫財等弊由詳

批龍泉一路主將久不到陳良玘威令不行致各營將士
往往殺降要功致賊黨死守不下可爲深恨業以行拏丁
文明王義此風或少息乎該道所議良是惜太晚耳如議

嚴行禁戢有犯者將領叅究軍士徑於令下斬首卽今川
兵大入賊已上國關內外假息遊魂免死爲幸不能奔衝
該道無妨就近隨營彈壓清理不卽焚香告天無益也緣
一件酌議運夫以免偏累等事巡下東道呈議運夫由

詳

批夫議更番固稱長便但起夫之處多則徵銀之處少該
路已用三十三州縣之夫通四路計之一百二十州縣尙
不足用也更於何處徵銀充價乎且用兵亦未必至十月
今旣給價只原州縣量再起夫不足者以附近州縣幫之
不必起至三十州縣之多也再議速報

一件軍務事宜慰安疆臣申稱自誓師以來節次攻打關國並稱烏江河渡官軍之失因本司地方相去甚遠又無聲息可聞安能飛越援救等因由詳

批一戰母氏國再執尙義黃繼之安氏兄弟報國之心明於皎日本部院自是推誠相信無復疑也仰畢節道諭令嚴督力戰以膺懋賞繳

一件軍務事畢節道呈安疆臣兵實糧應否給與由詳批貴州征討率用水西之甲從不給糧非自今日頃以勦播事重特爾破格該省所給已逾萬金卽本部院二次發犒已二千之上花幣逾等皆各土司所無也安氏母子旣

已得金卽應發來餉士早奏膚功乃中道而議糧是以一戰勝敵償上司之情賞而以無糧退兵存鄰比之私情誰爲疆臣畫此計者不但不忠於朝廷亦不忠於安疆臣矣仰該道會同該參及監軍道嚴論之如必欲按兵索糧及怯敵退兵查實另報

一件計擒叛賊心腹事安疆臣申報本司計擒獲賊心腹提調尙義等由詳

批尙義黃繼之逆賊之二心腹以當沙溪一路者也久令安疆臣圖之今一旦誘執令人快然疆臣此心可對天日誰謂水西觀望乎仰監軍道會同畢節道審明尙義黃繼

之再查一二坐寨緊要者固監留以獻俘餘盡臬示可也
繳

一件軍務事定遠縣申報買解過餉米積出羨餘米三
百石由詳

批該縣既先正餉又報餘米又不急於表暴先報本府令
報道令報兩院始以次申報又何其略無自多之心也仰
督餉道先行縣動銀四兩充獎仍候事完通敘繳

一件輸穀助餉事太平縣申教官張以聞關稱係永甯
衛人原籍積有穀一百石願充軍餉由詳

批卜式尙知輸粟助邊今兵連禍結民窮財盡無一人倡

義助餉者張以聞以一儒官有此舉可以風矣仰督餉道
行令運至合江縣支仍候事完議敘繳

一件黔哨失利賊將狂逞懇乞增兵加餉滅賊報讎以
收桑榆成績事承順宣慰彭元錦呈請再調本司兵一
萬名卑職外自備糧餉於前起之外再備報效兵八千
名卽督發進巢由詳

批承順兵名聞天下乃播賊以計殲之一軍皆沒真不共
戴天之仇也該司此舉自不容已但今播賊爲川兵殺盡
賊止率其戚屬上國自保仰本官速督在楚見兵前來合
勦令健士上國獲賊取心以祭死者豈不快哉若待取兵

同恐曠日持久爲人所得矣亟圖之繳

一件天鑒叛奴欺愚擅權屠戮十族百姓逐父殺母等事石砭宜撫司前掌印女土官覃氏申稱氏男馬千乘誣氏通播虛情由詳

批覃氏通播黨逆罪不容誅今不知陰圖賊首因罪爲功乃曉曉申辯讒害忠順之馬千乘不知天生此婦人何爲乃令其以賊爲親以子爲讎此來投文想亦爲賊探聽者仰巡下東道嚴究報

一件軍務事分守思仁道呈施州兵糧所少折色銀兩查在川省支辦期內或仍於川省發補或令楚省接支

或於黔中取給由詳

批此兵原應楚省支餉向以議論不定川省代爲餉耳已支者不補還足矣未支者自應於楚餉補足何論期也仰照行繳

一件懇恩備達請官署理事巡上東道呈新復松坎等五驛夫馬供應由詳

批據議已妥但此各州縣方起運夫官民俱無暇日復令徵銀供驛差反至遲誤計算各項之費一年該銀四千八百餘兩姑准於官銀內先支一半就近招人買馬應差庶事濟而民亦不擾委官俱依擬用此繳

一件多方議處等事布政司呈蜀府無米可糴止量行助餉似不必受由詳

批蜀藩既稱無米平買事曷可再強助米五千既有王命亦何可不受但此事自本部院發之今不受銀而但助米是本部院強之助也義亦未安仰司姑備五千石米價送之庶於事體爲妥此繳

一件申明兵將獨入苦戰徑逼賊圍事高推官呈稱十八日石砦等兵並綦江路兵攻破養馬城養雞城海巖等關劄營養雞養馬城若永合路則絕無一兵至乃該路反捏報爭功坐收人已成之功相應申明由詳

批賊已窮促亡在旦夕不能同心戮力剋日滅賊而文武官轉相朋比爭一關一城之功甚至飾虛架僞如鬼如蜮身自爲賊何以伐人尙方之劔不試果不足以滅賊仰東南二監軍道會同守東道查明速詳賊之墳墓有無發掘一併查報

一件夷兵因忿相殺事南路監紀知府蔡宗憲申報鎮雄兵與馬湖兵相殺由詳

批各兵調來爲勦賊而設未見尺寸之功輒日日鬪殺不已古人勇於公戰怯於私鬪視之甯無汗顏旣已解釋姑不深究再有犯者定以軍法重處領兵官一體連坐繳

一件請給部劄以勵血戰等事吳總兵呈請發部劄數張以便填給奮勇官兵由詳

批大將領兵數萬不敢向敵日惟高坐約降以致部兵與賊對坐終日不發一矢今乃爲之請劄加銜將誰欺欺天乎仰監軍道查報

一件軍務事劉總兵呈稱圍前左槽一帶雖分爲職信地見該二路吳陳二鎮官兵屯劄所餘無幾但左槽旣爲首可奔逸之處而內水巷尤爲喫緊要地恐賊從此脫逸咎將誰歸必須該道定立界限庶免推諉由詳

批劉總兵雖經罷任奉旨勦播旣有分定信地吳總兵何

故又行越占該路專以講降誤事已既不攻又不容人攻豈欲忠於賊耶仰分守道會同各監軍道查明分定信地以便責成繳

一件軍務事三省七監軍道呈各將官彼此推延作何結局該七道公議圍前圍後分日分哨至期攻打但事干軍機誠恐各鎮有專功懷利者仍前推諉不肯協力成功伏乞本部院嚴行申飭庶有責成由詳

批圍前難攻圍後易攻永合路占圍後一月已既不攻又不容人攻專以通賊縱賊爲事殊可痛恨今議易地迭攻甚爲得法以後各遵依挨日攻取周而復始再有執拗不

從及怠緩坐視者卽係賊黨定拏來以尙方從事通行知會繳

一件合圍共逼賊圍事吳總兵呈請行令諸將齊心僂力合圍攻圍由詳

批該鎮爲賊所愚欲專受降之功屢盟屢叛縱賊至今今見賊詐大露無可遮飾卻變爲就中取事三統爲號一鼓並進之說既有此議何不明告各鎮道一面白之本部院乎以前稟揭具在何嘗一字及此今輒舞文諉罪料該鎮不能辯此又監紀官之狡計也姑不深究以後照七道公詳批允事理分日易地迭攻周而復始如再執拗作梗擅

自分布及坐視縱賊並差人於賊中往來卽以遊黨論尙
方具在慎之慎之繳

一件軍務事巡下南道呈把總袁成祖凌虐運夫乾銷
米價乞行究處由詳

批營兵日減運夫日增乃糧餉只是不足固知有爲之漏
卮者在也袁成祖以一把總日折銷於外卽傾西蜀之民
以供合江一路之餉亦何益哉既有私票可據何所逃死
仰吳總兵會同監軍道查係何營把總審實斬首梟示繳
一件軍務事委官知縣鄧宏烈申請借支川餉數百接
濟嚴催楚餉補還由詳

批楚餉不繼施兵盡散矣今容桑二司亦欲散去而督餉部餉等官袖手傍觀略不經心若曰借川糧則川兵二十萬之餉豈神運鬼輸乎仰督餉道作速催解接濟仍將誤事各官查報以憑擊究繳

一件臥病不能供職事監紀史同知呈稱患病無醫可問乞允出外就醫等因由詳

批本官氣體素健何遂稱疾想因該營將領逗遛誤事縱賊遺患催之不動恐致叅究累及之故大賊未滅難容自便仰監軍道行令照舊供職仍嚴催劉總兵上緊攻圍平賊無得坐索高價致取罪累不便繳

一件勦播重務愈處愈竭等事都司吳從周呈本官領下募兵內有陣亡逃故近四百名請截日開除又陳希儒土兵三千零請盡汰由詳

批永合路各兵逃亡甚多支糧如故今糧夫萬若干辛死者相枕各將官但委官於關外折乾在營者仍脫巾而呼監紀官付之不聞所司何事吳從周可謂少知法紀然所報亦未盡仰監軍道速行清查繳

一件軍務事巡下南道呈犯兵劉承宗等銷米誤餉由詳

批營中萬眾待哺差役從外折乾致李春先一軍以無糧

逃散大誤軍機何論首從劉承宗陳貴俱斬首傳示三省
營中爲例小王兒既事不由己姑細打一百計贓科罪吳
從周差人壞事漫無稽查姑革去冠帶令以青衣大帽領
兵事完定奪魏光祚久不入營致壞糧運仍照前行提問
通行各營知會繳

一件軍務事貴州左監軍畢節二道呈查論過水西鎮
雄司府土官據稱並無通賊之情不敢妄行望功但求
免罪請示或離圍遠劄把截或徑掣回由詳

批本部院通賊之禁甚嚴近將領有以招降謀事者已經
處治乃該司目把猶襲故常安得不滋紛紛之議旣欲撤

退避嫌疑見恭順聞已於五月二十八日回兵當聽之俟
功完自當論功優敘近又有傳其擅據播土播民爲己業
者或係謗言亦當謹慎有功非難居功爲難楊氏之禍始
於無上必慎防弓蛇杯影之疑無但執狡兔走狗之說也
仰諭知之繳

一件遭際惡僚孽由自作等事播州應襲同知土舍羅
天寵呈請乞念忠順報效從征懇恩仍授撫夷同知將
原名下應管莊田乞另賞劄付給寵悉聽上司節制由
詳

批羅時豐一門爲逆首殲盡安得有子且彼釀禍構孽失

守宗祧朝廷取土地於逆賊之手羅天寵何人昌開許多
地土欲掩而有之狂妄之罪幾不下楊首矣仰監軍道會
同紀功道查議報

一件懇恩電閱血戰微功等事石砭宜撫司申請俯念
微功懇收懸賞銀五千兩贖還羅網壩姜池土民內撥
一二所給本司管業由詳

批所謂瓜分地土者謂不用朝廷人馬土司能自取之也
今調天下大兵土司因人成事微恩已幸輒妄意地土馬
千乘不諳事體可恨可恨仰高推官戒諭之繳

一件擒解苗賊事宜慰安疆臣申報本司以避嫌退兵

乞將前後功次敘錄以光天朝恩法以服西南人心其
卑司兵尙屯大水田等處勦捕餘黨招插凋民聽候詳
示由詳

批該司兵圍圍四十日屢攻不勝議論蜂起方令退劄後
被官兵一日而破圍今乃以爲讓人成功不勝怨望何也
該司以前戰功應候查明議敘今撤兵之令久下猶復劄
兵大水田安插凋民奉何明文豈欲據地以要君耶楊氏
之禍萌於無上保全爵土忠順爲先仰遵令撤回聽敘無
致多事繳

一件酉陽官兵在營懷讎等事永順宣慰司申請嚴禁

酉陽官兵不得在營起釁仍令敵血爲盟由詳

批酉陽人昔年爲該司兵所魚肉今旣相見其反唇相詆有之未聞有圍搶之事也賊兵已撤亦無處更敵血爲盟但該司以後當盡釋舊怨克敦新好睦鄰和民以保榮名無再生釁釀禍此繳

一件監理事竣夙疾舉發等事貴州左監軍道楊按察使呈患病乞休由詳

批該道自受事以來多方拮据備極勞瘁本院部深所憐念今當奏凱論功之時正宜靜攝以需大受何得言歸且善後之事尙費經營亦非可委而去之者仰一面調理一

面查敘功次及議善後事宜勿得杜門廢事此繳

一件軍務事巡下南道呈請浙兵功賞由詳

批苗功比先年增一倍給賞此係兵部題過賞格自應增行若老幼及失水未到及近日克圍奔潰未對敵而殺之者或削除或半給自當酌行又不可拘倍給之例也繳

一件施兵無糧散同等事分守思仁道呈報查過督餉部餉官並未違誤糧餉由詳

批施兵實以無糧潰散此眾所共見共知今管餉官所開數足者蓋儘起解之數算也雖解出而未到營彼能飛而食之乎以楚兵守黔地食川糧而猶然不能運至比至兵

飢而散則曰彼原欲歸以此借口可乎今功已完亦難深求但舉大事不宜若此黔楚多事用兵未已仍通行各官謹之於後可也繳

一件懇恩垂憐前烈等事重慶府申真州長官司請設學校由詳

批此文出土子之手真人膽錄滿眼差字既不願改流而獨願建學無非便於他日冒籍亦士子之意也真人附播破棊今卽投降豈得晏然如故仰巡上東道速議報

一件披露愚衷乞查賞格等事永甯宣撫司申請照賞格加參將或比黑烏蒙東川烏撒鎮雄等府給以軍民

府官職等因由詳

批永甯兵糜費錢糧甚多一向逗遛退怯何功之有今奢世續輒欲占據安村羅村桃洪灘及仁懷赤水地方明係叛逆罪不容誅仰巡下南道馬上差人查看如已占據從實速報以憑叅勦毋遲

一件懇定疆圉等事巡下南道呈解王繼先等由詳

批告設縣治是也而仍欲催糧馬應征調得無尙有擅地自治之意乎得隴望蜀小人常態仰會同在渝各道議妥速報

一件軍務事貴州左監軍道呈查李總兵官兵破圍軍

前將領並未搶掠國中財物由詳

批此事置之不問則非法追之不已則非情止憑逆賊口報坐追將領則不可以爲訓惟是本院部預行嚴禁三令五申各將公然弁髦視之令人憤憤文內既稱該道親在營中耳目共覩仰從公實開報以憑追究繳

一件懇恩差官以安地方事永甯宣撫司申請將淘洪安羅三村投降人民責令本撫承管提調糧馬悉從輸納設士設流出自上裁由詳

批淘洪安羅三村原係播地自應改流前該道建議欠妥本院部批駁詳語甚明該司何故又行瀆擾至有提調糧

馬之說殊無忌憚劉國用傅廷鑾等見利忘義必欲陷奢世續爲楊應龍而後已獨不慮已爲何漢良楊珠楊明之續耶仰巡下南道嚴行戒諭仍查明速報

一件遵諭披瀝血誠乞賜照察以明心迹以安分誼事
宣慰安疆臣申稱卽日論功行賞普天同慶乞念狗馬首事之難斬關摧鋒奪路之苦不惜甄敘片語之褒得霑寵命由詳

批安疆臣母子兄弟戮力勤王本院部深所鑒知卽向以一二疑似之迹遂來道路悠悠之議乃今賊已滅矣播已平矣該司心迹明於皎日向來流言適足爲洗雪之地耳

據申更見恭順之誠不日本院部敘功上聞自當膺受上賞惟甯心以聽之不必紛紛置辯也繳

一件軍務事巡下南道呈議扣留永合路各兵功賞解

京由詳

批扣銀解京本院部並無此行吳總兵何故公然倡議想其侵剋太多恐激變軍士故爲此以預爲掩罪之地耶該道輒爲呈請誤矣誤矣今會否扣留查明速報

一件夙病忽發等事推官高折枝呈稱患病不能供職今見奉委攝播州兵備職任事務重大益非奄奄病軀能勝乞容休致調理由詳

批播州新定經理維艱以本官有才守任勞任怨選擇而使眾謂得人何事復有此請耶且播平已逾半載彼中需人甚急方在題請何可言他仰重慶府諭留仍令作速入播視事無再遷延繳

一件地方事巡下南道呈永甯宣撫司地方以河爲界近因防播官兵布劄憑陵請行委職官先正疆界由詳批仁懷赤水自前代來卽爲播地乃五十四里之數王世光妻袁氏繳到誥命可查今該道云仁懷地方原屬蘭州有何憑據以河爲界之讒恐亦難憑永甯惡目自播州垂亡之時卽撥置女官混申邊界爲異日爭占之地今果然

矣該道以爲倖復原業不知果的爲彼原業否緝麻山李博堽皆發兵斬級取之彼皆以爲已業是朝廷三十萬大兵皆永甯紀綱之役而三省大擾大費總爲土司管家事也是誰開邊釁乎仰該道會同川東守巡二道作速查明邊界以杜後爭限半月內報

一件議處甦困事督餉道呈重慶府條議餉米等項開款由詳

批征播之役不得已而用民力萬若干辛令人酸鼻乃賊平兵解所司尙不爲一處追銀追米雞犬不甯不知生民何辜遭此厄也可嘆可嘆諸議俱准照行仍速移文俾早

遵守無令小民久在湯火繳

一件軍務事永順宣慰司統兵冠帶舍把彭宗惠等呈稱各兵原因乏食之苦殆非私逃懇乞明示班回由詳批凍死不拆屋餓死不搶糧此軍政也該司兵一缺食卽肆行搶掠不告而去有制之師豈若是乎旣已滅賊姑不深究准撤回無再生事取罪繳

祭文

祭諸葛武侯文

維萬曆二十七年歲次己亥五月戊申朔越二十五日壬申欽差總督川湖貴州軍務兼理糧餉巡撫四川地方兵

部右侍郎兼都察院右僉都御史李化龍奉命入蜀道經
故漢丞相大將軍忠武侯諸葛公墓下乃陳牲擊鼓爲文
以祭其詞曰嗚呼惟公受性忠貞賦才殊絕功蓋三分名
留萬劫昔漢中衰炎精霧塞九域橫分三綱湮滅公於其
間裂毗植髮輔漢興劉盡忠竭節北撻操魁東伏權賊身
柱乾坤手扶日月太華千尋洪河百折大義精忠於今爲
烈化龍晚代末學無能爲役抱痾歸田甘老巖穴偶值多
艱承乏授鐵誓銷氛祲以奠疆場瀘水巴山皆公舊國願
垂陰祐永綏蒼赤尙饗

祭房張二將軍文

維萬曆二十八年歲次庚子二月乙亥朔越日欽差總督
川湖貴州軍務兼理糧餉巡撫四川地方兵部右侍郎兼
都察院右僉都御史李化龍率川東監軍道左參政張棟
兵巡上川東道右參政張文燿暨重慶府衛縣文武官員
謹以牲醴庶羞之儀致祭於贈都督同知房將軍二位之
神曰嗚呼二將軍之死也經歲於今矣人亦有言死有重
於泰山有輕於鴻毛如二將軍之死輕耶重耶夫逆賊應
龍淫怒以逞荼毒生靈原野厭人之肉川谷流人之血既
有年於今矣人臣無將將則必誅封疆之臣滅此朝食豈
俟問哉乃數年來未有訟言誅之者何也懦者以私婪者

以賄苟就一切之利而不顧國家久遠之害晚近庸臣大
抵然耳蓋訟言誅之自房將軍始將軍提一旅捍孤城豈
足以當播州之全師顧義氣所激直欲捽逆賊而平吞之
恩重身輕威尊命賤所從來矣迨逆賊卷土而來相與從
事於顏行將軍不沮不懾擁孤軍以抗強敵又得謀勇具
足如張將軍其人者左右其間一戰東溪再戰四壩奮臂
一呼萬夫辟易斬將奪旗潰圍陷陣何其壯也終以力盡
援絕鼓衰士散竟至以身殉城然其英風義烈猶足吐懦
夫之氣激壯士之肝亦以奇矣且自二將軍死而後賊負
不可赦之罪人堅必誅賊之心九伐方張四征伊始此非

賊能死二將軍乃二將軍能滅賊也假令守碁江者非有
磊磊落落如二將軍必且與賊通必且爲賊諱養其鱗甲
長其羽翼突而鵠起席卷川巴李特孟昶前事不遠卽不
然而殺人者可以不死無君者可以自全將使人懷問鼎
之心戶比齒馬之迹僭擬成風綱常埽地不及十年人其
戎乎瓦解陸沈豈足爲喻蓋二將軍之死非獨以存蜀是
天下理亂得失之關也卽謂之重於泰山是耶非耶嗟乎
人誰無死以法死以賄死以寒疾不汗五日死以飲酒御
婦人死等死耳要以生無榮名死無令譽縱使百千萬劫
只如未生甚且遺之臭矣則其死輕也二將軍死事旣聞

天子嘉其義烈贈以極品賞以延世千秋廟貌比於睢陽
嗟嗟可不謂重耶化龍等既入渝城誓師勦逆高二將軍
之義乃爲文以祭之二將軍有靈當且率荼城之厲鬼以
殺賊始信二將軍果能滅賊而死乃益重也嗚呼尙饗

祭張監軍文

維萬曆二十八年歲在庚子七月壬寅朔越祭日丙辰欽
差總督川湖貴州軍務兼理糧餉巡撫四川地方都察院
右都御史兼兵部右侍郎李化龍謹以剛愷柔毛清醑庶
品之儀致祭於欽差監軍征播四川布政使司右參政還
樸張公之靈柩前曰嗚呼鄙諺有之人死留名誠得死所

雖死亦生惟公誕河山之粹氣毓燕趙之精英負奇每悲
歌慷慨臨事輒憤惋不平當其守山海備關州蓋嘗丸泥
封關稱北門之鎖鑰亦嘗鳴劍抵掌絕大漠以橫行旣逆
酋之發難遂杖策而西征和門數語肝膽立傾語時事腐
心動色恨叩九閭之無路談叛逆嚼齧立髮願捐七尺以
相從遂戎服而蹈重關之險乃匹馬而監卻月之營信明
天日威肅雷霆望之者鶴唳風聲而避歸之者箠食壺漿
以迎旣抵賊壘獨主齊盟時投袂而作三軍之氣時揮戈
而倡九地之攻義形於色卽眾怒羣猜其奚恤威加於敵
遂灰飛電掃以成功蓋聞初五之戰公獨搖旗助喊與賊

相持者終日初六之入公則勺水不下卒至勞形而斃精
蓋夫功以此立病以此成者與嗟夫公之死非一端矣當
其機可乘而輒失盟屢叛而無功甘養虎而遺患誰築室
而返耕縮朒者爲賊所愚至不以一矢相加遺庸債者縱
恣剽掠等三尺若一髮之輕卽走卒爲之氣塞何況受命
而監國之兵又况乎三月之間山嵐水瘴之與居困苦飢
渴之相仍公之死勞耶憤耶憂耶鬱耶不然胡爲乎以飄
飄凌雲之氣不數日而失藏山之壑咽鄰笛之聲嗟乎公
則死矣赤膽忠心之士竟與山原之道殫同命世之容容
碌碌者何限往往飽富貴而享功名顧廉頗藺相如其人

死矣千載之下猶有生氣曹蜍李志奄奄如泉下人何足
爲生愴當五月望後義師漸老余且脂車秣馬欲馳入柳
營而親取衡命者之首乃以家訃而不果於行獨洒泣而
草檄誓一死以激羣情卽大眾不無感動公獨搏膺頓足
矢諸天日遂以一日而克萬仞之城然則公之死半爲國
半爲我也余亦何心而不掩泣返袂涕洟瀾而淚縱橫臨
風一奠茹哀數語蓋半以紀公殉國之蹟而半以洩吾不
平之嗚嗚呼哀哉尙饗

平播全書卷十五終